

《佛說無量壽經》卷上

曹魏康僧鎧 譯

甲一、序分（分二）

乙一、證信序（分二）

丙一、信等五種成就

我聞如是，一時，佛住王舍城，耆闍崛山中。

丙二、聲聞菩薩會集（分二）

丁一、聲聞眾（分二）

戊一、舉數歎德

與大比丘眾萬二千人俱，一切大聖，神通已達。

戊二、略出名號

其名曰：尊者了本際，尊者正願，尊者正語，尊者大號，

尊者仁賢，尊者離垢，尊者名聞，尊者善實，

尊者具足，尊者牛王，尊者優樓頻螺迦葉，尊者伽耶迦葉，

尊者那提迦葉，尊者摩訶迦葉，尊者舍利佛，尊者大目犍連，

尊者劫賓那，尊者大住，尊者大淨志，尊者摩訶周那，

尊者滿願子，尊者離障，尊者流灌，尊者堅伏，

尊者面王，尊者異乘，尊者仁性，尊者嘉樂，

尊者善來，尊者羅云，尊者阿難。皆如斯等上首者也。

丁二、菩薩眾（分三）

戊一、列名

又與大乘眾菩薩俱：普賢菩薩，妙德菩薩，慈氏菩薩等，此賢劫中一切菩薩。

又賢護等十六正士：善思議菩薩，信慧菩薩，空無菩薩，

神通華菩薩，光英菩薩，慧上菩薩，智幢菩薩，

寂根菩薩，願慧菩薩，香象菩薩，寶英菩薩，
中住菩薩，制行菩薩，解脫菩薩。

戊二、歎德（分三）

己一、歎權實二德

皆遵普賢大士之德，俱諸菩薩無量行願，安住一切功德之法。

遊步十方，行權方便，入佛法藏，究竟彼岸。

己二、歎八相成道（分九）

於無量世界，現成等覺。

庚一、入胎相

處兜術天，弘宣正法，捨彼天宮，降神母胎。

庚二、出生相

從右脇生，現行七步。光明顯耀，普照十方。無量佛土，六種震動。

舉聲自稱：「吾當於世，為無上尊。」釋梵奉侍，天人歸仰。

庚三、童子相

示現算計，文藝射御。博綜道術，貫練群籍。

庚四、納妻相

遊於後園，講武試藝。現處宮中，色味之間。

庚五、出家相

見老病死，悟世非常。棄國財位，入山學道。

服乘白馬，寶冠瓔珞，遣之令還。捨珍妙衣，而著法服。

剃除鬚髮，端坐樹下，勤苦六年，行如所應。

庚六、成道相

現五濁剎，隨順群生。示有塵垢，沐浴金流。

天案樹枝，得攀出池，靈禽異從，往詣道場。
吉祥感徵，表章功祚。哀受施草，敷佛樹下，跏趺而坐。
奮大光明，使魔知之，魔率官屬，而來逼試，制以智力，皆令降伏。
得微妙法，成最正覺。

庚七、轉法輪相

釋梵祈勸，請轉法輪。以佛遊步，佛吼而吼。

扣法鼓，吹法螺，執法劍，建法幢。

震法雷，曜法電，澍法雨，演法施。常以法音，覺諸世間。

光明普照無量佛土，一切世界六種震動。

總攝魔界，動魔宮殿，眾魔懼怖，莫不歸伏。

搗裂邪網，消滅諸見。散諸塵勞，壞諸欲塹。

嚴護法城，開闡法門。洗濯垢汙，顯明清白。光融佛法，宣流正化。

入國分衛，獲諸豐膳。貯功德，示福田。

欲宣法，現欣笑。以諸法藥，救療三苦。顯現道意，無量功德。授菩薩記，成正等覺。

庚八、入涅槃相

示現滅度，拯濟無極。消除諸漏，植眾德本。

庚九、結歎

具足功德，微妙難量，遊諸佛國，普現道教。

己三、歎三祇修證（分二）

庚一、略歎

其所修行，清淨無穢。譬如幻師，現眾異像，為男為女，無所不變。本學明了，在意所為。

此諸菩薩，亦復如是。學一切法，貫綜縷練，所住安諦，靡不感化。無數佛土，

皆悉普現。未曾慢恣，慙傷眾生，如是之法，一切具足。

庚二、廣歎（分二）

辛一、般若道（分二）

壬一、修

菩薩經典，究暢要妙。名稱普至，道御十方。

無量諸佛，咸共護念。佛所住者，皆已得住。大聖所立，而皆已立。如來道化，各能宣布。為諸菩薩，而作大師。

以甚深禪慧，開導眾生。通諸法性，達眾生相。

明了諸國，供養諸佛。化現其身，猶如電光。善學無畏之網，曉了幻化之法。壞裂魔網，解諸纏縛。

壬二、證

超越聲聞緣覺之地，得空無相無願三昧。

善立方便，顯示三乘。於此化終，而現滅度。

亦無所作，亦無所有，不起不滅，得平等法。

具足成就無量總持，百千三昧。

諸根智慧，廣普寂定。深入菩薩法藏，得佛華嚴三昧，宣揚演說一切經典。

辛二、方便道（分二）

壬一、修

住深定門，悉睹現在無量諸佛，一念之頃，無不周遍。

濟諸劇難，諸閑不閑。分別顯示真實之際，得諸如來辯才之智。入眾言音，開化一切。

超過世間諸所有法，心常諦住度世之道。

於一切萬物，而隨意自在。為諸庶類，作不請之友。荷負群生，為之重擔。受持如來甚深法藏，護佛種性常使不絕。

與大悲，愍眾生。演慈辯，授法眼。杜三趣，開善門。以不請之法，施諸黎庶。如純孝之子，愛敬父母。於諸眾生，視若自己。

壬二、證

一切善本，皆度彼岸。悉獲諸佛，無量功德。智慧聖明，不可思議。

戊三、舉數

如是之等菩薩大士，不可稱計，一時來會。

乙二、發起序（分三）

丙一、世尊現瑞

爾時世尊，諸根悅豫，姿色清淨，光顏巍巍。

丙二、阿難請問佛

尊者阿難，承佛聖旨，即從座起，偏袒右肩，長跪合掌，而白佛言：「今日世尊，諸根悅豫，姿色清淨，光顏巍巍。如明鏡淨，影暢表裏。威容顯要，超絕無量，

未常瞻覩殊妙如今。

唯然大聖！我心念言：今日世尊住奇特之法，今日世雄住諸佛所住，今日世眼住導師之行，今日世英住最勝之道，今日天尊行如來之德。

去來現在佛佛相念，得無今佛念諸佛耶？何故威神光光乃爾？」

於是世尊告阿難曰：「云何阿難，諸天教汝來問佛耶？自以慧見問威顏乎？」
阿難白佛：「無有諸天來教我者，自以所見問斯義耳。」

丙三、世尊歎許說（分三）

丁一、讚歎阿難

佛言：「善哉！阿難，所問甚快。發深智慧，真妙辯才。愍念眾生，問斯慧義。」

丁二、讚歎如來（分四）

戊一、歎出世本懷

「如來以無盡大悲，矜哀三界，所以出興於世，光闡道教。欲拯濟群萌，惠以

真實之利。無量億劫，難值難見。猶靈瑞華，時時乃出。今所問者，多所饒益，開化一切，諸天人民。」

戊二、歎福智具足

「阿難當知，如來正覺，其智難量，多所導御。慧見無礙，無能過絕。」

戊三、歎色身自在

「以一餐之力，能住壽命億百千劫，無數無量，復過於此，諸根悅豫，不以毀損，姿色不變，光顏無異。」

戊四、歎定慧圓滿

「所以者何？如來定慧，究暢無極，於一切法，而得自在。」

丁三、世尊許說

阿難諦聽，今為汝說。對曰：「唯然，願樂欲聞。」

甲二、正宗分（分二）

乙一、上求（分三）

丙一、勝緣（分二）

丁一、遠緣

佛告阿難：「乃往過去久遠無量不可思議無央數劫，錠光如來，興出於世，教化度脫無量眾生，皆令得道，乃取滅度。

次有如來，名曰光遠，次名月光，次名栴檀香，次名善山王，次名須彌天冠，次名須彌等曜，次名月色，次名正念，次名離垢，次名無著，次名龍天，次名夜光，次名安明頂。

次名不動地，次名琉璃妙華，次名琉璃金色，次名金藏，次名炎光，次名炎根，次名地種，次名月像，次名曰音，次名解脫華，次名莊嚴光明，次名海覺神通，次名水光。

次名大香，次名離塵垢，次名捨厭意，次名寶炎，次名妙頂，次名勇立，次名

功德持慧，次名蔽曰月光，次名日月琉璃光，次名無上琉璃光，次名最上首，次名菩提華，次名月明。

次名日光，次名華色王，次名水月光，次名除癡冥，次名度蓋行，次名淨信，次名善宿，次名神威，次名法慧，次名鸞音，次名師子音，次名龍音，次名處世，如此諸佛，皆悉已過。」

丁二、近緣

「爾時，次有佛，名世自在王，如來，應供，等正覺，明行足，善逝，世間解，無上士，調御丈夫，天人師，佛，世尊。」

丙二、勝行（分四）

丁一、法藏因地（分三）

戊一、聞法發心

「時有國王。聞佛說法，心懷悅豫，尋發無上正真道意。」

戊二、出家修行

「棄國捐王，行作沙門，號曰法藏，高才勇哲，與世超異。」

戊三、發菩提心（分三）

詣世自在王如來所，稽首佛足，右繞三市，長跪合掌，以頌讚曰：

己一、歎佛功德

「光顏巍巍，威神無極。如是炎明，無與等者。

日月摩尼，珠光燄耀，皆悉隱蔽，猶如聚墨。

如來顏容，超世無倫。正覺大音，響流十方。

戒聞精進，三昧智慧，威德無侶，殊勝希有。

深諦善念，諸佛法海，窮深盡奧，究其涯底。

無名欲怒，世尊永無。人雄師子，神德無量。

功勳廣大，智慧深妙，光明威相，震動大千。」

己二、願上求下化

「願我作佛，齊聖法王。過度生死，靡不解脫。
布施調意，戒忍精進，如是三昧，智慧為上。
吾誓得佛，普行此願。一切恐懼，為作大安。
假令有佛，百千億萬，無量大聖，數如恆沙。
供養一切，斯等諸佛，不如求道，堅正不卻。
譬如恆沙，諸佛世界，復不可計，無數剎土，
光明悉照，徧此諸國。如是精進，威神難量。
令我作佛，國土第一。其眾奇妙，道場超絕。
國如泥洹，而無等雙。我當愍哀，度脫一切。
十方來生，心悅清淨，已至我國，快樂安隱。」

己三、請佛證知

「幸佛明信，是我真證。發願於彼，力精所欲。

十方世尊，智慧無礙，常令此尊，知我心行。

假使身止，諸苦毒中，我行精進，忍終不悔。」

丁二、至心精進（分四）

戊一、請示修行

佛告阿難：「法藏比丘說此頌已，而白佛言：『唯然世尊，我發無上正覺之心。

願佛為我廣宣經法，我當修行，攝取佛國清淨莊嚴無量妙土。令我於世，速成正覺，拔諸生死勤苦之本。』」

佛告阿難：「時世自在王佛，語法藏比丘：『如所修行，莊嚴佛土，汝自當知。』」

比丘白佛：『斯義弘深，非我境界。唯願世尊，廣為敷演諸佛如來淨土之行。我聞此已，當如說修行，成滿所願。』」

戊二、正示行法

「爾時世自在王佛，知其高明，志願深廣，即為法藏比丘而說經言：『譬如大海，一人斗量，經歷劫數，尚可窮底，得其妙寶。人有至心精進，求道不止，會當剋果，何願不得。』」

於是世自在王佛，即為廣說二百一十億諸佛剎土，天人之善惡，國土之麤妙，應其心願，悉現與之。」

戊三、依教修行

「時彼比丘，聞佛所說嚴淨國土，皆悉覩見，起發無上殊勝之願。其心寂靜，志無所著。一切世間，無能及者。具足五劫，思惟攝取莊嚴佛國清淨之行。」

戊四、解答疑難

阿難白佛：「彼佛國土，壽量幾何？」佛言：「其佛壽命，四十二劫。」

丁三、發大誓願（分三）

戊一、結前生後

時，法藏比丘，攝取二百一十億諸佛妙土清淨之行。如是修已，詣彼佛所，稽首禮足，繞佛三匝，合掌而住。白佛言：「世尊！我已攝取莊嚴佛土清淨之行。」佛告比丘：「汝今可說，宜知是時，發起悅可一切大眾。菩薩聞已，修行此法，緣致滿足，無量大願。」

戊二、宣說大願

比丘白佛：「唯垂聽察，如我所願，當具說之：

一、國中無三惡道願

設我得佛，國有地獄餓鬼畜生者，不取正覺。

二、不復更生惡道願

設我得佛，國中天人壽終之後，復更三惡道者，不取正覺。

三、各得真金色身願

設我得佛，國中天人，不悉真金色者，不取正覺。

四、形色無有好醜願

設我得佛，國中天人，形色不同，有好醜者，不取正覺。

五、生者皆得宿命願

設我得佛，國中天人，不識宿命，下至知百千億那由他諸劫事者，不取正覺。

六、皆得天眼徹視願

設我得佛，國中天人，不得天眼，下至見百千億那由他諸佛國者，不取正覺。

七、皆得天耳徹聽願

設我得佛，國中天人，不得天耳，下至聞百千億那由他諸佛所說，不悉受持者，

不取正覺。

八、皆得知他心念願

設我得佛，國中天人，不得見他心智，下至知百千億那由他諸佛國中眾生心念者，不取正覺。

九、皆得神足飛行願

設我得佛，國中天人，不得神足，於一念頃，下至不能超過百千億那由他諸佛國者，不取正覺。

十、不起想念貪計願

設我得佛，國中天人，若起想念，貪計身者，不取正覺。

十一、正定必至涅槃願

設我得佛，國中天人，不住定聚，必至滅度者，不取正覺。

十二、光明遍照十方願

設我得佛，光明有限量，下至不照百千億那由他諸佛國者，不取正覺。

十三、壽命同佛永久願

設我得佛，壽命有限量，下至百千億那由他劫者，不取正覺。

十四、聲聞廣多無量願

設我得佛，國中聲聞，有能計量，乃至三千大千世界眾生，悉成緣覺，於百千劫，悉共計較，知其數者，不取正覺。

十五、人壽修短隨意願

設我得佛，國中天人，壽命無能限量。除其本願，修短自在。若不爾者，不取正覺。

十六、國中無不善名願

設我得佛，國中天人，乃至聞有不善名者，不取正覺。

十七、諸佛稱名讚歎願

設我得佛，十方世界無量諸佛，不悉咨嗟稱我名者，不取正覺。

十八、十念皆生我國願

設我得佛，十方眾生，至心信樂，欲生我國，乃至十念，若不生者，不取正覺。
唯除五逆，誹謗正法。

十九、勤修我接引願

設我得佛，十方眾生，發菩提心，修諸功德，至心發願，欲生我國，臨壽終時，
假令不與大眾圍繞現其人前者，不取正覺。

二十、繫念必得往生願

設我得佛，十方眾生，聞我名號，繫念我國，植眾德本，至心迴向，欲生我國，
，不果遂者，不取正覺。

二十一、各具三十二相願

設我得佛，國中天人，不悉成滿三十二大人相者，不取正覺。

二二、菩薩一生補處願

設我得佛，他方佛土諸菩薩眾，來生我國，究竟必至一生補處。除其本願自在所化。為眾生故，披宏誓鎧，積累德本，度脫一切。遊諸佛國，修菩薩行，供養十方諸佛如來。開化恆沙無量眾生，使立無上正真之道，超出常倫諸地之行，現前修習普賢之德。若不爾者，不取正覺。

二三、一時普供諸佛願

設我得佛，國中菩薩，承佛神力，供養諸佛，一食之頃，不能遍至無數無量億那由他諸佛國者，不取正覺。

二四、供具自皆如意願

設我得佛，國中菩薩，在諸佛前，現其德本，諸所求欲供養之具，若不如意者，不取正覺。

二五、菩薩演一切智願

設我得佛，國中菩薩，不能演說一切智者，不取正覺。

二六、菩薩得金剛身願

設我得佛，國中菩薩，不得金剛那羅延身者，不取正覺。

二七、萬物悉皆殊特願

設我得佛，國中天人，一切萬物，嚴淨光麗，形色殊特，窮微極妙，無能稱量。

其諸眾生，乃至逮得天眼，有能明了，辯其名數者，不取正覺。

二八、菩薩道樹普見願

設我得佛，國中菩薩，乃至少功德者，不能知見其道場樹無量光色，高四百萬

里者，不取正覺。

二九、受經普得智辯願

設我得佛，國中菩薩，若受讀經法，諷誦持說，而不得辯才智慧者，不取正覺。

三十、智辯無有限量願

設我得佛，國中菩薩，智慧辯才，若可限量者，不取正覺。

三一、淨國照見十方願

設我得佛，國土清淨，皆悉照見十方一切無量無數不可思議諸佛世界，猶如明鏡，睹其面像。若不爾者，不取正覺。

三二、嚴飾超諸天人願

設我得佛，自地以上，至於虛空、宮殿樓觀，池流華樹，國土所有一切萬物，皆以無量雜寶百千種香而共合成。嚴飾奇妙，超諸天人。其香普熏十方世界。菩薩聞者，皆修佛行。若不如是，不取正覺。

三三、蒙光觸身獲益願

設我得佛，十方無量不可思議諸佛世界眾生之類，蒙我光明觸其身者，身心柔軟，超過天人。若不爾者，不取正覺。

三四、皆得法忍總持願

設我得佛，十方無量不可思議諸佛世界眾生之類，聞我名字，不得菩薩無生法忍，諸深總持者，不取正覺。

三五、信樂永離女身願

設我得佛，十方無量不可思議諸佛世界，其有女人，聞我名字，歡喜信樂，發菩提心，厭惡女身。壽終之後，復為女像者，不取正覺。

三六、常修梵行成佛願

設我得佛，十方無量不可思議諸佛世界諸菩薩眾，聞我名字，壽終之後，常修梵行，至成佛道。若不爾者，不取正覺。

三七、歸依感動天人願

設我得佛，十方無量不可思議諸佛世界諸天人民，聞我名字，五體投地，稽首

作禮，歡喜信樂，修菩薩行，諸天世人，莫不致敬。若不爾者，不取正覺。

三八、妙服自然在身願

設我得佛，國中天人，欲得衣服，隨念即至，如佛所讚應法妙服，自然在身。有求裁縫擣染浣濯者，不取正覺。

三九、受樂同於漏盡願

設我得佛，國中天人，所受快樂，不如漏盡比丘者，不取正覺。

四十、隨意見諸佛國願

設我得佛，國中菩薩，隨意欲見十方無量嚴淨佛土，應時如願，於寶樹中，皆悉照見，猶如明鏡，睹其面像。若不爾者，不取正覺。

四一、聞名諸根具足願

設我得佛，他方國土諸菩薩眾，聞我名字，至於得佛，諸根缺陋，不具足者，

不取正覺。

四二、悉得清淨解脫願

設我得佛，他方國土諸菩薩眾，聞我名字，皆悉速得清淨解脫三昧。住是三昧，一發意頃，供養無量不可思議諸佛世尊，而不失定意。若不爾者，不取正覺。

四三、聞名生處尊貴願

設我得佛，他方國土諸菩薩眾，聞我名字，壽終之後，生尊貴家。若不爾者，不取正覺。

四四、修行具足德本願

設我得佛，他方國土諸菩薩眾，聞我名字，歡喜踴躍，修菩薩行，具足德本。若不爾者，不取正覺。

四五、皆得三昧見佛願

設我得佛，他方國土諸菩薩眾，聞我名字，皆悉逮得普等三昧。住是三昧，至於成佛，常見無量不可思議一切諸佛。若不爾者，不取正覺。

四六、自然得聞妙法願

設我得佛，國中菩薩，隨其志願所欲聞法，自然得聞。若不爾者，不取正覺。

四七、即得不退轉地願

設我得佛，他方國土諸菩薩眾，聞我名字，不即得至不退轉者，不取正覺。

四八、即得諸忍究竟願

設我得佛，他方國土諸菩薩眾，聞我名字，不即得至第一忍，第二第三法忍，於諸佛法，不能即得不退轉者，不取正覺。

戊三、立誓勉求（分四）

己一、立誓求願滿果滿

佛告阿難：「爾時，法藏比丘，說此願已，以偈頌曰：

我建超世願，必至無上道，斯願不滿足，誓不成等覺。
我於無量劫，不為大施主，普濟諸貧苦，誓不成等覺。
我至成佛道，名聲超十方，究竟有不聞，誓不成等覺。」

己二、立誓求功圓因圓

「離欲深正念，淨慧修梵行，志求無上尊，為諸天人師。
神力演大光，普照無際土，消除三垢冥，明濟眾厄難。
開彼智慧眼，滅此昏盲暗，閉塞諸惡道，通達善趣門。
功祚成滿足，威曜朗十方，日月戢重暉，天光隱不現。
為眾開法藏，廣施功德寶，常於大眾中，說法師子吼。
供養一切佛，具足眾德本，願慧悉成滿，得為三界雄。
如佛無礙智，通達靡不照。願我功德力，等此最勝尊。」

己三、請證要瑞

「斯願若剋果，大千應感動，虛空諸天神，當雨珍妙華。」

己四、現瑞記歎

佛語阿難：「法藏比丘，說此願已，應時普地六種震動，天雨妙華，以散其上。

自然音樂，空中讚言：『決定必成無上正覺。』」

丁四、積功累德（分二）

戊一、總明依願起修

「於是法藏比丘，具足修滿如是大願，誠諦不虛，超出世間，深樂寂滅。

阿難！法藏比丘，於其佛所，諸天魔梵龍神八部大眾之中，發斯弘誓，建此願已，一向專志，莊嚴妙土。」

戊二、別明積功累德（分二）

己一、修莊嚴國土行

「所修佛國，開廓廣大，超勝獨妙，建立常然，無衰無變。於不可思議兆載永

劫，積植菩薩無量德行。」

己二、修莊嚴法身行（分十）

庚一、施戒圓淨

「不生欲覺、瞋覺、害覺，不起欲想、瞋想、害想，不著色、聲、香、味、觸、法。」

庚二、忍進成就

「忍力成就。不計眾苦，少欲知足。」

庚三、定慧具足

「無染患癡，三昧常寂，智慧無礙。」

庚四、三業無過

「無有虛偽，諂曲之心，和顏愛語，先意承問。」

庚五、誨人不倦

「勇猛精進，志願無倦，專求清白之法，以惠利群生。」

庚六、福慧雙修（分二）

辛一、修福

「恭敬三寶，奉事師長，以大莊嚴，具足眾行，令諸眾生，功德成就。」

辛二、修慧

「住空無相無願之法，無作無起，觀法如化。」

庚七、離惡修善（分二）

辛一、離惡

「遠離粗言，自害害彼，彼此俱害。」

辛二、修善

「修習善語，自利利人，人我兼利。」

庚八、捨家棄欲

「棄國捐王，絕去財色，自行六波羅蜜，教人令行。」

庚九、時空無盡

「無央數劫，積功累德。」

庚十、依正殊勝（分二）

辛一、依報殊勝

「隨其生處，在意所欲，無量寶藏，自然發應。教化安立無量眾生，住於無上

正真之道。」

辛二、正報殊勝（分二）

壬一、福德殊勝

「或為長者居士，豪姓尊貴。或為剎利國君，轉輪聖帝。或為六欲天主，乃至

梵王。

常以四事，供養恭敬一切諸佛。如是功德，不可稱說。

口氣香潔，如優鉢羅華。身諸毛孔，出栴檀香，其香普薰無量世界。容色端正，相好殊妙。

其手常出無盡之寶，衣服飲食，珍妙華香，繪蓋幢幡，莊嚴之具。如是等事，超諸天人。」

壬二、智慧殊勝

「於一切法，而得自在。」

丙三、勝果（分十四）

丁一、法藏成佛（分三）

戊一、所成佛身（分二）

己一、阿難申問

阿難白佛：「法藏菩薩，為已成佛而取滅度？為未成佛，為今現在？」

己二、釋尊略答

佛告阿難：「法藏菩薩，今已成佛，現在西方，去此十萬億刹。」

戊二、所成佛土

「其佛世界，名曰安樂。」

戊三、何時成佛

阿難又問：「其佛成道已來，為經幾時？」

佛言：「成佛已來，凡歷十劫。」

丁二、國土寶嚴

戊一、先明彼土所有（分三）

己一、明體相

「其佛國土，自然七寶，金、銀、瑠璃、珊瑚、琥珀、磲磔、瑪瑙、合成為地。」

己二、明量相

「恢廓曠蕩，不可限極，悉相雜次，轉相間入。」

己三、明莊嚴相

「光赫煜爍，微妙奇麗，清淨莊嚴，超踰十方一切世界眾寶中精，其寶猶如第六天寶。」

戊二、次明彼土所無（分二）

己一、總申所無

「又其國土，無須彌山，及金剛圍，一切諸山。亦無大海小海，溪渠井谷。佛神力故，欲見則見。亦無地獄餓鬼畜生諸難之趣。亦無四時春夏秋冬夏，不寒不熱，常和調適。」

己二、辨無所以

爾時，阿難白佛言：「世尊！若彼國土，無須彌山，其四天王，及忉利天，依何而住？」

佛語阿難：「第三炎天，乃至色究竟天，皆依何住？」

阿難白佛：「行業果報，不可思議。」

佛語阿難：「行業果報不可思議，諸佛世界亦不可思議，其諸眾生功德善力，住行業之地，故能爾耳。」

阿難白佛：「我不疑此法，但為將來眾生，欲除其疑惑，故問斯義。」

丁三、光明無量（分五）

戊一、釋尊讚歎（分二）

己一、對劣歎勝

佛告阿難：「無量壽佛，威神光明，最尊第一，諸佛光明，所不能及。

或照百佛世界，或千佛世界，取要言之，乃照東方恆沙佛剎。南西北方，四維上下，亦復如是。

或有佛光照於七尺，或一由旬，二三四五由旬，如是轉倍，乃至照一佛剎。」

己二、結歎顯勝

「是故無量壽佛，號無量光佛，無邊光佛，無礙光佛，無對光佛，炎王光佛，清淨光佛，歡喜光佛，智慧光佛，不斷光佛，難思光佛，無稱光佛，超曰月光佛。」

戊二、見聞獲益（分三）

己一、滅惡益

「其有眾生，遇斯光者，三垢消滅。」

己二、生善益

「身意柔軟，歡喜踴躍，善心生焉！」

己三、離苦得樂益

「若在三塗，極苦之處，見此光明，皆得休息，無復苦惱。壽終之後，皆蒙解脫。」

戊三、諸聖共歎

「無量壽佛，光明顯赫，照曜十方。諸佛國土，莫不聞焉。不但我今，稱其光明，一切諸佛聲聞緣覺諸菩薩眾，咸共歎譽，亦復如是。」

戊四、重明聞光利益（分二）

己一、稱說得隨願往生益

「若有眾生，聞其光明威神功德，日夜稱說，至心不斷，隨意所願，得生其國。」

己二、往生得如佛光明益

「為諸菩薩，聲聞之眾，所共歎譽，稱其功德；至其最後得佛道時，普為十方諸佛菩薩，歎其光明，亦如今也。」

戊五、結歎

佛言：「我說無量壽佛光明威神，巍巍殊妙，晝夜一劫，尚未能盡。」

丁四、壽命無量（分二）

戊一、佛壽無量

佛語阿難：「又無量壽佛，壽命長久，不可稱計，汝寧知乎？假使十方世界，無量眾生，皆得人身，悉令成就聲聞緣覺，都共集會，禪思一心，竭其智力，於百千萬劫，悉共推算，計其壽命長遠之數，不能窮盡，知其限極。」

戊二、人壽長遠

「聲聞菩薩，天人之眾，壽命長短，亦復如是，非算數譬喻所能知也。」

丁五、聖眾無量（分三）

戊一、明數無量

「又聲聞菩薩，其數難量，不可稱說。」

戊二、明德殊勝

「神智洞達，威力自在，能於掌中，持一切世界。」

戊三、重顯眾多

佛語阿難：「彼佛初會，聲聞眾數不可稱計，菩薩亦然。如大目犍連，百千萬

億無量無數，於阿僧祇那由他劫，乃至減度，悉共計校，不能究了，多少之數。

譬如大海，深廣無量。假使有人析其一毛，以為百分，以一分毛，沾取一滯，於意云何，其所滯者，於彼大海，何所為多？」

阿難白佛：「彼所滯水，比於大海多少之量，非巧歷算數、言辭譬類，所能知也。」

佛語阿難：「如目連等，於百千萬億那由他劫，計彼初會聲聞菩薩，所知數者，猶如一滯，其所不知，如大海水。」

丁六、七寶諸樹（分二）

戊一、明樹體相（分三）

己一、純寶樹

「又其國土，七寶諸樹，周滿世界。金樹、銀樹、琉璃樹、玻璃樹、珊瑚樹、碼碯樹、磲磔之樹。」

「或有二寶三寶，乃至七寶，轉共合成。或有金樹，銀葉華果。或有銀樹，金葉華果。或琉璃樹，玻璃為葉，華果亦然。或水精樹，琉璃為葉，華果亦然。或珊瑚樹，碼碯為葉，華果亦然。或碼碯樹，琉璃為葉，華果亦然。或碑磬樹，眾寶為葉，華果亦然。

或有寶樹，紫金為本，白銀為莖，玻璃為枝，水精為條，珊瑚為葉，碼碯為華，碑磬為實。

或有寶樹，白銀為本，琉璃為莖，水精為枝，珊瑚為條，碼碯為葉，碑磬為華，紫金為實。

或有寶樹，琉璃為本，水精為莖，珊瑚為枝，碼碯為條，碑磬為葉，紫金為華，白銀為實。

或有寶樹，水精為本，珊瑚為莖，碼碯為枝，碑磬為條，紫金為葉，白銀為華，

琉璃為實。

或有寶樹，珊瑚為本，碼碯為莖，碑礪為枝，紫金為條，白銀為葉，琉璃為華，水精為實。

或有寶樹，碼碯為本，碑礪為莖，紫金為枝，白銀為條，琉璃為葉，水精為華，珊瑚為實。

或有寶樹，碑礪為本，紫金為莖，白銀為枝，琉璃為條，水精為葉，珊瑚為華，碼碯為實。」

己三、總歎

「行行相值，莖莖相望，枝枝相準，葉葉相向，華華相順，實實相當，榮色光曜，不可勝視。」

戊二、明樹功用

「清風時發，出五音聲，微妙宮商，自然相和。」

丁七、道場寶樹（分二）

戊一、明道樹體量莊嚴（分二）

己一、體量

「又無量壽佛，其道場樹，高四百萬里，其本周圍五千由旬，枝葉四布二十萬里。一切眾寶，自然合成。」

己二、莊嚴

「以月光摩尼，持海輪寶，眾寶之王，而莊嚴之。

周匝條間，垂寶瓔珞，百千萬色，種種異變，無量光炎，照耀無極。

珍妙寶網，羅覆其上，一切莊嚴，隨應而現。」

戊二、明寶樹功用

「微風徐動，吹諸寶樹，演出無量妙法音聲，其聲流布，遍諸佛國。

聞其音者，得深法忍，住不退轉，至成佛道，耳根清徹，不遭苦患。目覩其色、

鼻知其香、口嘗其味、身觸其光、心以法緣，皆得甚深法忍，住不退轉，至成佛道，六根清徹，無諸惱患。」

「阿難！若彼國土天人，見此樹者，得三法忍：一者音響忍，二者柔順忍，三者無生法忍。」

此皆無量壽佛，威神力故，本願力故，滿足願故，明了願故，堅固願故，究竟願故。」

丁八、樂聲演法（分二）

戊一、樹出妙聲

佛告阿難：「世間帝王，有百千音樂，自轉輪聖王，乃至第六天上，伎樂音聲，展轉相勝千億萬倍。第六天上萬種樂音，不如無量壽國諸七寶樹一種音聲千億倍也。」

戊二、樂聲演法

「亦有自然萬種伎樂。又其樂聲，無非法音。清暢哀亮，微妙和雅，十方世界音聲之中，最為第一。」

丁九、堂舍樓觀（分二）

戊一、明體相

「其講堂精舍，宮殿樓觀，皆七寶莊嚴，自然化成。」

戊二、明莊嚴相

「復以真珠，明月、摩尼、眾寶，以為交絡，覆蓋其上。」

丁十、七寶浴池（分五）

戊一、明池量相

「內外左右，有諸浴池。或十由旬，或二十三十，乃至百千由旬，縱廣深淺，皆各一等。」

戊二、明水性相

「八功德水，湛然盈滿，清淨香潔，味如甘露。」

戊三、明池體相

「黃金池者，底白銀沙。白銀池者，底黃金沙。

水精池者，底琉璃沙。琉璃池者，底水精沙。

珊瑚池者，底琥珀沙。琥珀池者，底珊瑚沙。

磲磔池者，底碼碯沙。碼碯池者，底磲磔沙。

白玉池者，底紫金沙。紫金池者，底白玉沙。

或有二寶三寶，乃至七寶，轉共合成。」

戊四、明莊嚴相

「其池岸上，有栴檀樹，華葉垂布，香氣普熏。天優鉢羅華，鉢曇摩華，拘牟頭華，分陀利華，雜色光茂，彌覆水上。」

戊五、明池水功用（分四）

己一、資用隨意

「彼諸菩薩，及聲聞眾，若入寶池。

意欲令水沒足，水即沒足。欲令至膝，即至於膝。

欲令至腰，水即至腰。欲令至頸，水即至頸。

欲令灌身，自然灌身。欲令還復，水輒還復。

調和冷暖，自然隨意。開神悅體，蕩除心垢。

清明澄潔，淨若無形。寶沙映徹，無深不照。

微瀾迴流，轉相灌注。安詳徐逝，不遲不疾。」

己二、波出妙聲

「波揚無量自然妙聲，隨其所應，莫不聞者。

或聞佛聲，或聞法聲，或聞僧聲，或寂靜聲，空無我聲，大慈悲聲，波羅蜜聲，

或十力無畏不共法聲，諸通慧聲，無所作聲，不起滅聲，無生忍聲，乃至甘露灌頂，眾妙法聲。

如是等聲，稱其所聞，歡喜無量。」

己三、能生善樂

「隨順清淨離欲寂滅真實之義，

隨順三寶力無所畏不共之法，

隨順通慧菩薩聲聞所行之道。」

己四、結歎

「無有三塗苦難之名，但有自然快樂之音，是故其國，名曰安樂。」

丁十一、衣食自然（分三）

戊一、略歎三業殊勝

「阿難！彼佛國土，諸往生者，具足如是清淨色身，諸妙音聲，神通功德。」

戊二、廣明衣食自然

「所處宮殿，衣服飲食，眾妙華香，莊嚴之具，猶第六天自然之物。

若欲食時，七寶鉢器，自然在前。金、銀、琉璃、磲磬、碼碯、珊瑚、琥珀、明月、真珠，如是諸鉢，隨意而至。百味飲食，自然盈滿。

雖有此食，實無食者，但見色聞香，意以為食，自然飽足。身心柔軟，無所味著。事已化去，時至復現。」

戊三、結歎常樂我淨

「彼佛國土，清淨安隱，微妙快樂，次於無為泥洹之道。」

丁十二、顏貌端正（分二）

戊一、正報微妙

「其諸聲聞菩薩天人，智慧高明，神通洞達，咸同一類，形無異狀，但因順餘方，故有天人之名。」

顏貌端正，超世希有，容色微妙，非天非人，皆受自然虛無之身，無極之體。

戊二、校量顯勝

佛告阿難：「譬如世間貧窮乞人，在帝王邊，形貌容狀，寧可類乎？」

阿難白佛：「假令此人在帝王邊，羸陋醜惡，無以為喻，百千萬億不可計倍。所以然者，貧窮乞人，底極斯下，衣不蔽形，食趣支命，飢寒困苦，人理殆盡。皆坐前世不植德本，積財不施，富有益慳，但欲唐得，貪求無厭。不信修善，犯惡山積。」

如是壽終，財寶消散。苦身聚積，為之憂惱，於己無益，徒為他有。無善可怙，無德可恃，是故死墮惡趣，受此長苦。罪畢得出，生為下賤，愚鄙斯極，示同人類。所以世間帝王，人中獨尊，皆由宿世，積德所致。慈惠博施，仁愛兼濟，履信修善，無所違爭。

是以壽終福應，得升善道。上生天上，享茲福樂。積善餘慶，今得為人，乃生

王家，自然尊貴。儀容端正，眾所敬事。妙衣珍膳，隨心服御。宿福所追，故能致此。」

佛告阿難：「汝言是也！計如帝王，雖人中尊貴，形色端正。比之轉輪聖王，甚為鄙陋，猶彼乞人在帝王邊也。」

轉輪聖王，威相殊妙，天下第一，比之忉利天王，又復醜惡，不得相喻萬億倍也。

假令天帝，比第六天王，百千億倍不相類也。

設第六天王，比無量壽佛國菩薩聲聞，光顏容色，不相及逮，百千萬億不可計倍。」

丁十三、總歎莊嚴（分四）

戊一、資具稱心

佛告阿難：「無量壽國，其諸天人，衣服、飲食、華香、瓔珞、綰蓋、幢旛，

微妙音聲，所居舍宅、宮殿、樓閣，稱其形色、高下、大小。或一寶、二寶，乃至無量眾寶，隨意所欲，應念即至。」

戊二、地上莊嚴

「又以眾寶妙衣，遍布其地，一切天人，踐之而行。」

戊三、虛空莊嚴

「無量寶網，彌覆佛土。皆以金縷真珠，百千雜寶，奇妙珍異，莊嚴校飾。周匝四面，垂以寶鈴，光色晃曜，盡極嚴麗。」

自然德風，徐起微動。其風調和，不寒不暑，溫涼柔軟，不遲不疾。吹諸羅網，及眾寶樹，演發無量微妙法音，流布萬種溫雅德香。

其有聞者，塵勞垢習，自然不起。風觸其身，皆得快樂，譬如比丘，得滅盡三昧。」

戊四、散花莊嚴

「又風吹散華，遍滿佛土，隨色次第，而不雜亂。柔軟光澤，馨香芬烈。足履其上，蹈下四寸，隨舉足已，還復如故。」

華用已訖，地輒開裂，以次化沒，清淨無遺。隨其時節，風吹散華，如是六反。」

丁十四、華光出佛（分五）

戊一、明華數量

「又眾寶蓮華，周滿世界。」

戊二、明華形色

「一一寶華，百千億葉，其華光明，無量種色，青色青光，白色白光，玄黃朱紫，光色赫然，煒燁煥爛，明曜日月。」

戊三、明華放光

「一一華中，出三十六百千億光。」

戊四、光中出佛

「一一光中，出三十六百千億佛，身色紫金，相好殊特。」

戊五、化佛度生

「一一諸佛，又放百千光明，普為十方說微妙法。如是諸佛，各各安立無量眾生於佛正道。」